



Rabu, 02 November 2022

Ogen: Daniel 5:1-9



"Mbulan Ayo"



Melala kejadiin si la iarap jadi bas kegeluhen si erbahansa kita mbiar. Salah sada contohna e me: linur ngugur taneh, kerina gedung-gedung mugur-ugur. Kerina jelma e kiamen, mbiar idabuhi runtuhen gedung e ras sidebanna. Kebiaren e erbahansa ayo pe mbulan. Kecewa ras kebiaren e banci teridah arah ayota.

Kejadiin si ialaken Belsasar tupung erbahan kerja mbelin dengen minem-minem lau anggur ras temanna seribu kalak e me rempet reh sada tan manusia, ndarat i bas dingding, janah i idah Belsasar tan ndai sangana nurat. Kejadiin e erbahan turah kebiarena seh maka mbulan ayona dengen tiwenna pe nggigir. Gulut kal ukur Belsasar sabap pengenehenen e la biasa. La terukurisa kai ertina, e maka lit sura-surana nungkun man guru-guru permangmang. Kenca isungkunna, sekalak pe guru ndai la beluh nuriken erti nipina e, emaka reh biarna ia, reh gulutna pe ukurna.

Pengalaman Belsasar enda, megati ka nge jadi pengalaman bas kegeluhennta. Tupung kita jumpa kebiaren turah ukurta gulut sidarami me serpang pulah man "si meteh wari," guru si beluh nggoge/guru si baso. Erkiteken mbiar ras aru ateta, lanai siukuri perbahanennta e encedai ku bas kinitekennta. Lanai turah ukurta lako nuriken perbebenta man serayan Tuhan.

Mbulan gia ayota, nggigir gia tiwenta entah pe kulanta erkiteken turah persoalen ula kel sempat bene kinitekennta. Persoalen entah perbeben si jadi e situhuna banci nambahi paguh ukur ras kinitekennta. Sabap kita itempa megegeh ngalakensa. Labo ban gegehta maka kita ngasup ngalakensa tapi perbahan gegeh Tuhan lit i bas kita, si mereken kengasupen ras kepentaren. tetaplah kita erpengarapen ras erpengendes man Tuhan. Erkiteken Ia ngenca ngasup mulahi kita ibas persoalen nari.